

PRIMERA CARTA DEL APOSTOL SAN JUAN

Ñee tecove opa mbae vae umee vae

¹ Nduicuatía noī peve jocua Ñee tecove opa mbae vae umee vae regua. Jae jecuaeño ico ndei iví uyeyapo mbove. Jare ore nduyandu jocua Ñee. Nduecha cavi. Numae jese. Nduyavíqui vi orepo pe etei. ² Jocua Ñee tecove opa mbae vae etei co. Numimbeu peve quirái ore etei nduecha. Nduicuaaca peve jae co tecove opa mbae vae. Jae imeño mai ico yandeRu Tumpa ndive ndei iví uyeyapo mbove, ērei ou uyecuaa oreve. ³ Numimbeu peve nduecha jare nduyandu vae, pe reta vi piñemíru vaerã ore ndive. Añetete ñañemíru ma yandeRu Tumpa jare Tai Jesucristo ndive. ⁴ Jare cua mbaembae regua nduicuatía peve piyerovia ete vaerã.

Tumpa ico tembipe oī vae pe

⁵ Numimbeu peve ñee Jesucristo umimbeu oreve vae. Jae co cua: Tumpa ico tembipe oī vae pe. Ico'ā etei pítumimbi oī vae pe. ⁶ Aramoi yae ñañemíru ma co jae ndive. Ērei yaico yave pítumimbi oī vae pe yugüireco vae rami, yandeapu co. Yaico'ā co añete vae rupi. ⁷ Ērei yaico yave tembipe oī vae pe yugüireco vae rami - echo'ā Tumpa vi ico tembipe oī vae pe - ñañemíru uyupii, jare Jesucristo jugüi yandeyoe opaete

yanembaeoya reta güi. Jesucristo co jae Tumpa Tai.

⁸ Yae yave yandeyoa'ã co, yayembitavi co. Yae'ã etei co añete vae. ⁹ Yamimbeu yave Tumpa pe yanembaeoya reta, yandepuere yarovia catu Tumpa umbiasa vaerã yandeve yanembaeoya reta, jae jipi ramo. Jae yandeyoeta co opaete jipi mbae vae yayapo vae güi. ¹⁰ Yae yave yayapo'ã co mbaeyoa, Tumpa iñee ico'ã yandepia pe. Echa'ã Tumpa jei yayapo co mbaeyoa. Jáeramo yayapo'ã yave mbaeyoa, Tumpa iyaputa tẽi co.

2

Cristo uyerure Tumpa pe yanderé

¹ Cheraí reta, aicuatía cua mbaembae regua peve agüiye vaerã peyoa. Êrei yandeyoa yave, ime co quía uyerure yandeRu Tumpa pe yanderé vae. Jae co Jesucristo. Jae co jipi vae. ² Tumpa uiporaracata tẽi yandeve yanembaeoya reta jeco pegua. Êrei Jesucristo uiporara yandepicá pe, agüiye vaerã Tumpa uiporaraca yandeve. Jare Jesucristo umano opaete ivi pegua reta imbaeyoa reta re, yanembaeoya reta reño'ã co.

³ Jesucristo iporoyocui reta yayapo yave, cua uicuaaca yandeve yaicuaa co. ⁴ Ime yave quía, “Aicuaa co Jesucristo”, jei vae, iyapu co uyapo'ã yave Jesucristo iporoyocui reta. Jocua nunga jei'ã añete vae. ⁵ Êrei Jesucristo jei vae uyapo vae añetete uau ete Tumpa. Jare yaau yave Tumpa, yaicuaa yande co jae Jesucristo imbae reta. ⁶ Ime yave quía, “Che co jae Cristo imbae”, jei vae, tuico cavi Jesucristo ico rami.

Mboroyocui ipiau vae

⁷ Cherivi reta, cua aicuatía aĩ peve vae mboroyocui ipiau vae'ã co. Jaeño penti mboroyocui indechi vae iyipi güive picuua vae. Cua mboroyocui indechi vae co jae ñee piyandu iyipi güive vae.
⁸ Ërei cua mboroyocui mburuau regua jecuaeño ipiau. Jesucristo yanderau jare pe reta piyerau vi. Echa'ã pítumimbi uasa ma jare tembipe añetete vae jembipe oĩ.

⁹ Ime yave quía, “Che aico tembipe oĩ vae pe”, jei vae, ërei umitarëi yave ūru upurugüirovia vae, jecuaeño ico pítumimbi oĩ vae pe. ¹⁰ Ime yave quía ūru upurugüirovia vae uau vae, jae jecuaeño ico tembipe oĩ vae pe. Jáeramo ipuere uecha cavi uguata cavi vaerã uyepiaca mbae reve. ¹¹ Ërei ime yave quía ūru upurugüirovia vae umitarëi vae, jae jecuaeño ico pítumimbi oĩ vae pe. Jáeramo jae co uguata oo pítumimbi pe vae rami. Uicua'ã queti ra oo oĩ vae. Echa'ã ipuere'ã etei uecha pítumimbi pe.

¹² Aicuatía cuarãi peve, cheraí reta, Tumpa umbiasa peve pembaeyoa reta ramo. Umbiasa ma peve Jesucristo jee re. ¹³ Tae ucuacuua vae reta pe cua: Aicuatía cuarãi peve picuua Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicuatía cuarãi peve pemiamiri aña guasu ramo. Aicuatía cuarãi peve, cheraí reta, picuua yandeRu Tumpa ramo.

¹⁴ Tae ye ucuacuua vae reta pe cua: Aicuatía cuarãi peve picuua Jesucristo ramo. Jae imeño mai ico ndei ivi uyeyapo mbove. Tae tairusu vae

reta pe cua: Aicuatía cuarāi peve pepirāta pepurugüirovia re ramo, jare Tumpa iñee ico pepia pe ramo, jare pemiamiri aña guasu ramo.

¹⁵ Agüiye peau cua ivi pegua. Agüiye peau mbaembae ivi pe ñugüinoi vae. Ime yave quía cua ivi pegua uau vae, uau'ã co Tumpa. ¹⁶ Cua ivi pegua uau vae reta jecuaeño uipota iporopota jare uipota opaete mbaembae ipóra vae uecha vae jare uyembicate imbaembae re. Ërei opaete cua ivi pegua co. YandeRu Tumpa pegua'ã co. ¹⁷ Jare cua ivi pegua opata co. Jare opa ma yave, ndarau quía uipota ye. Ërei Tumpa jei vae uyapo vae icota jaeño mai pegua.

Cristo ndive oyovaicho vae

¹⁸ Cheraí reta, ou ma uvae ara taicuegua reta. Piyandu quirai Cristo ndive oyovaicho vae outa co. Ërei añave ime ñugüinoi jeta Cristo ndive oyovaicho vae reta. Jáeramo yaicuaa ou ma co uvae ara taicuegua reta. ¹⁹ Jae reta uyembíyao yandegüi, añetete'ã uñemíru yande ndive ramo. Echa'ã añetete uñemíru yave yande ndive, jecuae uyembatita tēi yande ndive. Ërei uyembíyao reta yandegüi, uyecuaa vaerã añetete'ã co uñemíru yande ndive.

²⁰ Ërei Espíritu Santo ou ma pepia pe. Jáeramo pe reta picuaa opaete. ²¹ Pe reta jae'ã co añete vae picuaa'ã vae. Picuaa co añete vae. Jáeramo aicuatía peve. Jare picuaa quirai penti apu añete vae pegua'ã co.

²² Ime yave quía, “Jesús jae'ã co Cristo”, jei vae, jae co penti iyapu vae. Ime yave quía güirovia'ã

yandeRu Tumpa jare Tai re vae, jae co Cristo ndive oyovaicho vae. ²³ Ime yave quía güirovia'ã Tumpa Tai re vae, jae uicuaa'ã etei yandeRu Tumpa. Ërei güirovia Tumpa Tai re vae uicuaa co yandeRu Tumpa.

²⁴ Jáeramo jecuaeño perovia iyipi güive piyemboe jese vae. Echa'ã jucuarãi yave, jecuaeño piñemíru cavita Tumpa Tai ndive jare yandeRu Tumpa ndive vi. ²⁵ Jare Tumpa jei ma umeeta co yandeve tecove opa mbae vae.

²⁶ Cuarãi aicuatía ma peve, amimbeu vaerã peve jocua uipota pembopia vaerã Tumpa güi vae reta. ²⁷ Ërei Tumpa umee ma peve Espíritu Santo, jare jae ico pepia pe. Jáeramo picuaa ma cua regua ñru vae umimbeu peve mbae reve. Echa'ã Espíritu Santo pemboe opaete mbaembae re, jare Espíritu Santo jecuaeño jei añete vae. Ipuere'ã etei iyapu. Jáeramo jecuaeño piñemíru Jesucristo ndive Espíritu Santo pemboe rami.

²⁸ Añave, cheraí reta, piñemiatangãtu piñemíru vaerã Jesucristo ndive. Jucuarãi yave, jae ou ye yave, ñaïta jae jovai yayerovia reve. Ndarau ñanemara jae ndive ñaïneoväiti yave. ²⁹ Picuaa quirãi Tumpa co jae jupi vae. Jáeramo picuaa vi quirãi Tumpa umee ma tecove opa mbae vae opaete jupi vae uyapo vae reta pe.

3

Tumpa tai reta

¹ Mase, yandeRu Tumpa ñanereni jae tai retarã. Cua uicuaaca yandeve quirãi yandeRu Tumpa yanderau ete. Jáeramo upurugüirovia mbae vae

reta yandecuaa cavi'ã, uicuaa'ã Tumpa ramo. ² Cheriví reta, añave yande co jae Tumpa tai reta. Jare Tumpa ndeiño uicuaaca yandeve quirāita ra ñaã. Êrei yaicuaa ñaïta co Cristo rami jae ou ye yave. Echa'ã yaecha cavita. Jae etei oïta yanderovai. ³ Jare ime yave quía uâro oï uyerovia reve uecha vaerã vae, jae uipota ete ico iyoa mbae reve. Echa'ã Cristo iyoa mbae vae co.

⁴ Ime yave quía mbaeyoa uyapo vae, jae uyaví Tumpa iporoyocui. Echa'ã iyoa vae uyaví Tumpa iporoyocui. ⁵ Jare picuaa quirâi Jesucristo uyeyapo cuimbaerã umbai vaerã yanembaeyoa reta. Jare jae iyoa'ã etei. ⁶ Ime yave quía uñemíru Jesucristo ndive vae, jae uipota'ã jecuaeño iyoa. Jecuaeño uipota iyoa vae Jesucristo imbae'ã co. Uicuaa'ã etei Jesucristo.

⁷ Cheraí reta, agüiye quía tapembítavi. Jesucristo jipi co. Jae ramiño vi jipi vae uyapo vae jipi co. ⁸ Jecuaeño mbaeyoa uyapo vae aña guasu imbae co. Echa'ã aña guasu jecuaeño iyoa iyipí güive. Jare Tumpa Tai uyeyapo cuimbaerã umbai vaerã aña guasu iparavíqui.

⁹ Tumpa güi tecove opa mbae vae güinoi vae jecuaeño uyapo'ã mbaeyoa. Echa'ã güinoi ma tecove Tumpa güi. Jáeramo ipuere'ã jecuaeño uyapo mbaeyoa. Echa'ã ime ma güinoi tecove opa mbae vae Tumpa güi. ¹⁰ Jare yandepuere yaicuaa quía ra co jae Tumpa tai reta jare quía ra co jae aña guasu tai reta. Ime yave quía jipi vae uyapo mbae vae, jae Tumpa imbae'ã co. Jae ramiño vi ime yave quía íru upurugüirovia vae uau'ã vae, jae Tumpa imbae'ã co.

11 Echa'ã iyipi güive piyandu cua ñee: Yayerau. **12** Agüiye yayapo Caín uyapo rami. Echa'ã Caín aña guasu imbae co jare uyuca tivi. Jare picuua co maera uyuca. Caín uyapo icavi mbae vae, jare tivi uyapo jupi vae. Jáeramo Caín uyuca tivi.

13 Agüiye pepiacañi, cherivi reta, upurugüirovia mbae vae reta pemitarëi yave. **14** Yande yaicuua yaasa ma co mano güi tecove opa mbae vae pe, ñru upurugüirovia vae reta yaau ramo. Ñru upurugüirovia vae uau'ã vae güinoi'ã tecove opa mbae vae. **15** Ime yave quía ñru upurugüirovia vae umitarëi vae, jae penti upuruyuca vae rami co. Jare picuua quirai penti upuruyuca vae güinoi'ã etei tecove opa mbae vae. **16** Jesucristo etei uicuaaca yandeve Tumpa ipuruau. Echa'ã umano yanderé. Jae ramíño vi icavi co yande ñamano vaerã ñru upurugüirovia vae reta re. **17** Ërei ime yave quía mbaembæ ivi pegua re icocatu vae, jare ime yave upurugüirovia vae mbaembæ uata chupe vae, jocua icocatu vae ñatëi yave ombori mbaembæ uata chupe vae, jae güinoi'ã Tumpa ipuruau ipia pe. **18** Cherai reta, añetete yaau yave ñru vae, yayapota mbae yambori vaerã. Ndarau ñanemiariño yandepurugüirovia re. **19-20** Cuarai yaicuaata yaico co añete vae re, jare yepe teli yayembijeco mbae re yandepia pe, Ërei yandepiagatuta Tumpa joaque. Echa'ã Tumpa uicuaa jeta ete opaete yande yaicuaa vae güi. Tumpa uicuaa opaete. **21** Cherivi reta, yayembijeco'ã yave yandepia pe, jecuaeno yandepuere yaya Tumpa re yaquiy'e mbae reve. **22** Jare yayerure yave Tumpa pe

mbae re, jae umeeta yandeve, yayapo iporoyocui reta ramo. Echa'ã jocua yayapo vae umbiyerovia Tumpa. ²³ Jare Tumpa jei yandeve yarovia vaerã Tai Jesucristo jee re jare yayerau vaerã. Jae co mboroyocui Tumpa umimbeu yandeve vae. ²⁴ Jare Tumpa iporoyocui reta uyapo vae uñemiru Tumpa ndive, jare Tumpa uñemiru jae ndive. Jare yaicuaa Tumpa uñemiru co yande ndive. Echa'ã Tumpa umee yandeve Espíritu Santo ico vaerã yandepia pe.

4

Ñee uyuavi vae reta

¹ Cheriví reta, ime cuá iví pejeta upurumbitaví vae reta. Jae reta jei iyapu reve: “Che co jae penti Tumpa iñee umimbeu vae.” Jáeramo pepia pe piyemingueta cavi piyandu vae re, agüiye vaerã perovia ñee ou'ã Tumpa güi vae. ² Yandepuere yaicuaa ou ra ñee Tumpa iEspíritu güi. Echa'ã ñee umimbeu peve vae jei yave Jesús co jae Cristo cuimbaerã uyeyapo vae, jocua ñee ou Tumpa güi. ³ Ërei ñee umimbeu peve vae yave jei'ã Jesús co jae Cristo, jocua ñee ou'ã Tumpa güi. Jocua upurumbitaví vae oyovaicho Cristo ndive. Echa'ã piyandu quirai Cristo ndive oyovaicho vae reta yugueruta co. Jare ime ma ñugüinói iví pe.

⁴ Cheraí reta, pe reta co jae Tumpa imbae reta, jare pemiamiri ma Cristo ndive oyovaicho vae reta. Echa'ã Espíritu Santo ico pepia pe jare jae imbaepuere tuicha ete iví pegua reta iya imbaepuere güi. ⁵ Echa'ã jae reta iví pegua co. Jáeramo uyemingueta mbaembae iví pegua reño,

jare upurugüirovia mbae vae reta uyapisaca cavi jese reta. ⁶ Ërei yande co jae Tumpa imbae reta. Ime yave quía uicuaa Tumpa vae, jae uyapisaca yanderé. Ërei ime yave quía Tumpa imbae'ã vae, jae uyapisaca'ã yanderé. Jare cuarãi yaicuaa añete vae pegua ra penti ñee, ani taví pegua ra.

Tumpa mburuau etei co

⁷ Cheriví reta, yayerau. Echa'ã Tumpa umee yandeve mburuau. Jare upuruau vae güinoi tecove opa mbae vae Tumpa güi, jare uicuaa Tumpa. ⁸ Upuruau mbae vae uicuaa'ã Tumpa. Echa'ã Tumpa mburuau etei co. ⁹ Tumpa ombou Tai jae vaeño ivi pe yande ñanoi vaerã tecove opa mbae vae Tai uyapo yandeve vae jeco pegua. Jare jucuarãi Tumpa uicuaaca yandeve yanderau co. ¹⁰ Jáeramo yaicuaa ma mburuau añetete vae. Echa'ã tenonde yave yande yaau'ã Tumpa. Ërei Tumpa yanderau jare ombou Tai ivi pe, jae uiporara vaerã yanembaeyoa reta re, agüiye vaerã Tumpa uiporaraca yandeve.

¹¹ Cheriví reta, Tumpa yanderau ete. Jáeramo jae uipota yayerau vaerã. ¹² Mbaeti etei quía uecha Tumpa. Ërei yayerau yave, Tumpa ico yandepia pe, jare mburuau Tumpa coti ñanoi vae jecuaeño ucuacuaa.

¹³ Jare Tumpa umee ma yandeve iEspíritu. Jáeramo yaicuaa yande ñañemíru co Tumpa ndive, jare Tumpa ico yandepia pe. ¹⁴ Ore nduecha Tumpa Tai, jare numimbeu íru vae reta pe quirãi yanderu Tumpa ombou Tai ivi pe umbiasa vaerã ivi pegua reta. ¹⁵ Ime yave quía, “Jesús co jae Tumpa Tai”, jei vae, jae uñemíru Tumpa ndive,

jare Tumpa ico ipia pe. ¹⁶ Yaicuaa Tumpa yanderau co jare yarovia jecuaeño yanderauta co. Tumpa mburuau etei co. Jare upuruau reve ico vae uñemíru Tumpa ndive, jare Tumpa ico ipia pe.

¹⁷ Jare ñañemíru Tumpa ndive ramo, mburuau Tumpa coti ñanoí vae ucuacuaa, yandepuere vaerä ñaí Tumpa jovai yaquïye mbae reve jocua ara ñaneräa yave. Echa'ã cua ivi pe yaico rambueve, Tumpa ico yandepia pe. ¹⁸ Ndaraau yaquïye Tumpa güi, jae yanderau ramo. Tumpa ipuruau tuicha ete. Jáeramo ndaraau yaquïye chugüi. Echa'ã ime yave quía Tumpa güi uquïye vae, jae ipia pe uyemingueta Tumpa uiporaracata co chupe. Tumpa güi uquïye vae uicuaa'ã Tumpa uau ete co.

¹⁹ Yande yaau Tumpa jae rani yanderau ramo. ²⁰ Ime yave quía, “Che aau Tumpa”, jei vae, umitarëi yave íru upurugüirovia vae, iyapu co. Echa'ã uau'ã íru upurugüirovia vae, yepe tēi ipuere uecha. Jáeramo ipuere'ã uau Tumpa. Echa'ã uecha'ã etei Tumpa. ²¹ Jare Tumpa umimbeu ma yandeve cua mboroyocui: “Uau Tumpa vae tuau vi íru upurugüirovia vae.”

5

Quiräi yaicuaa Tumpa tai reta

¹ Opaete güirovia Jesús co jae Cristo vae reta güinoi tecove opa mbae vae Tumpa güi. Jare uau yandeRu Tumpa vae uau vi Tumpa tai reta. ² Yaau yave Tumpa jare yayapo yave Tumpa iporoyocui reta, yaicuaa yaau co Tumpa tai reta. ³ Echa'ã yaau yave Tumpa, yayapo iporoyocui reta, jare yavai'ã co yayapo vaerä iporoyocui reta. ⁴ Tecove

opa mbae vae Tumpa güi güinoi vae umiamiri ivi pegua oyovaicho jae ndive vae. Añete co, yandepuere ñamiamiri ivi pegua oyovaicho yande ndive vae yandepurugüirovia rupi. ⁵ Güirovia Jesúz co jae Tumpa Tai vae ipuere umiamiri ivi pegua oyovaicho jae ndive vae.

Espíritu Santo umimbeu vae

⁶ Jesucristo umbipi iparavíqui uyembibautizaca ma i pe yave, jare opa uyapo iparavíqui umano curusu re yave. Jaeño'ã umbipi iparavíqui. Opa uyapo umano curusu re yave. Jare Espíritu Santo umimbeu cua regua. Echa'ã Espíritu Santo jecuaeño umimbeu añete vae. ⁷ Jare ime ara pe mbapi cua regua umimbeu vae. Echa'ã yandeRu Tumpa jare Nee jare Espíritu Santo umimbeu pâve. Jare cua mbapi pentiño co. ⁸ Jae ramiño vi ime ivi pe mbapi cua regua umimbeu vae. Echa'ã Espíritu Santo jare i jare Jesúz jugüi umimbeu pâve penti ramiño. ⁹ Yarovia ivi pegua reta umimbeu yandeve vae, yepe têi amo pe umimbeu yandeve vae añete vae'ã co. Ërei Tumpa umimbeu yandeve vae jecuaeño añete vae. Jáeramo jecuaeño yandepuere yarovia Tumpa umimbeu yandeve vae. Jare jae umimbeu yandeve Jesúz regua cuarãi: “Cua co jae cheRai.” ¹⁰ Tumpa Tai re güirovia vae uicuaa ipia pe Jesúz co jae Tumpa Tai. Jare Tumpa etei umimbeu yandeve cua. Jáeramo cua güirovia'ã vae güirovia'ã Tumpa. Ërei cua añete'ã yave, Tumpa iyaputa têi co yandeve. ¹¹ Jare Tumpa umimbeu yandeve cua: Jae umee yandeve tecove opa mbae vae. Ime ñanoi cua tecove opa mbae vae Tumpa Tai re yarovia ramo. ¹² Tumpa Tai güinoi ipia pe

vae ime gǖinoi tecove opa mbae vae. Tumpa Tai gǖinoi mbae ipia pe vae gǖinoi'ã tecove opa mbae vae.

Picuaa penoi co tecove opa mbae vae

¹³ Pe reta perovia Tumpa Tai jee re. Jáeramo aicuatía cua peve picuaa vaerã penoi co tecove opa mbae vae. ¹⁴ Jare yandepuere yarovia catu Tumpa. Echa'ã yaicuaa Tumpa uyandu co yandeve yayerure yave chupe mbae jae uipota yayerure vaerã chupe jese vae re. ¹⁵ Jare cuarãi yayerure chupe mbae re yave, yaicuaa jae uyapota co yandiyerure. Echa'ã yaicuaa jae uyandu co yandeve.

¹⁶ Penti upurugüirovia vae uyapo yave mbaeyoa, ūru upurugüirovia vae ipuere uyerure Tumpa pe jese, jocua mbaeyoa mano pegua'ã yave. Jucuarãi yave, Tumpa umaeñota mbaeyoa uyapo vae re icoño vaerã. Ime co penti mbaeyoa mano pegua. Penti upurugüirovia vae uyapo yave jocua nunga mbaeyoa, ūru upurugüirovia vae agüiye tuyerure Tumpa pe jese. ¹⁷ Opaete mbae jupi mbae vae mbaeyoa co. Ërei ime mbaeyoa mano pegua'ã vae.

¹⁸ Yaicuaa tecove opa mbae vae Tumpa gǖinoi vae jecuaeño uyapo'ã mbaeyoa. Echa'ã Tumpa Tai etei uyandareco jese agüiye vaerã aña guasu uipisi.

¹⁹ Yaicuaa yande co jae Tumpa tai reta jare quirãi aña guasu gǖinoi mbaepuere opaete upurugüirovia mbae vae reta re.

²⁰ Jae ramiño vi yaicuaa Tumpa Tai ou ma co cua ivi pe jare umee yandeve yaicuaa vaerã Tumpa

añetete vae. Ñañemířu ma Tumpa ndive. Echa'ă ñañemířu ma Tumpa Tai Jesucristo ndive. Jae co Tumpa añetete vae. Jae umee yandeve tecove opa mbae vae.

²¹ Cheraí reta, agüiye pembiadora tumpa-raanga reta. Amén.

**Nuevo Testamento Guarani Pe
New Testament in Guaraní, Western Bolivian
(BL:gnw:Guarani, Western Bolivian)**

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

09a8356f-416c-5877-91cf-40f681db481e